

CART PAR DE BNIETY HEBREOS

¹ Tiamp gulalqui, Dios guninény de to xpíngul gulalni zienzi güelt ne de iralote mod pur de profet ni gunii xtiidxny, ² per anre aguninény dunní pur Lliinny. Dios banchuuny irate de ni nuu lo guichliu ne llayabaa pur Lliinny. Ax irate absáanny laznaa Lliinny, ³ laany ni náy bcháa nasaa xte Dios, laany ni náy zectziac ni ná Dios. Ax laany zunény irate de ni nuu cun xtiidxny pur guelrnabee ni napny. Chi bialo gudeedny irate ni ná par teedny par yan pur de xtuldní, ax guriny llayabaa lad naldí xte Xtadny Dios ni nap irate guelrnabee.

⁴ Ziy xquel ax laany mazru sacny lo de ángli xte Dios pur ni laaniy Lliinpac Dios. ⁵ Te pur Dios quít guuti dxi niaipny nic tuby de ángli:

Liú noo llingaana,
ne desde anre isienia dec liúy Lliinia.
Ne nicza tuby de ángli quít raipti Dios:
Nare gaca Xtadu,
chiy liú gacu lliinia.

⁶ Per chi bxiaald Dios Lliinny lo guichliu, Lliinny ni nap guelrnabee zectziac laany, ax guniiny:
Irate de ángli xtena,
gulto Lliinia.

⁷ Chiy chi gunii Dios pur de ángli, laany guniiny:
Nare runa de ángli xtena zec bi,
ne runzacadeb zec bal.

⁸ Per pur Lliinny ax guniiny:

Liú noo Dios.

Guelrnabee xtenu a ná par chazy,
ne iduibtiamp te acanabiu zec ni riáld.

⁹ Liú rdxalaazu ni ná güen
chiy rdxichníu ni ná mal.

Pur ningui, Dios ni ná xtiozu
bsiáldny liú mazru guelrzaclaaaz que iraru de ni
zuguaniú.

¹⁰ Ziyza guniiny:

Dad, desde gulo Liú banchuu guichliu ne yabaa
cun irate de ni nuu lo guichliu ne llayabaa.

¹¹ Iratedeni zuu dxi nitlodeni,
per liú anabániu par chazy.

Iradeni ziullydeni zec tuby lady;

¹² Sieetiuden i zec ni rsieety bniety xabni,
ne schuudeni zec ni rchu bniety xabni.

Per liú quit chúuti dxi ichu zec ni noo,
ne iduibtiamp te anapu guelnabány.

¹³ Dios quit guuti dxi niaipny nic tuby de ángli
xtenny:

Guri lad naldí xtena axtqui góna gan inabiiu lo de
ni rdxichné liú.

¹⁴ Te pur irate de ángli ná spírit ni cayun sirvi
lo Dios, ax rxiaaldny laadeny par gacnédeny de
bniety ni gap guelnabány par chazy nez lo Dios.

2

¹ Pur ningui, rquiinpac idxanní cuend xtiidx
Dios ni abindiagní te par quit izunén zec ni
azonuun xnezny. ² Te pur zec ni guzub irate
xtiidx Dios ni gunii de ángli tiamp gulalqui, chiy
de bniety ni quit bcuadiagti diidx, de bniety ni
baany duld biálddeb castigu ni ná par yálddeb. ³ Ax,

¿xólesa ldán lo castiguqui belati néza dunní quit idxanní cuend xtiidx Dios ni rguixtee xa xquel par gacní perdón? Ne lagac Dad Jesucrist gudixtee pur perdónre desdí gulo, chiy de bniety ni bindiagni, laadeb gudixteedebni lon. ⁴ Ax zec ni aguud bniety iriny iriny guelnán pur Spíritu Sant zec ni ná xgab Dios, ne pur de seny, de milagri cun iraloteru ni rdxalo bniety, ziy xquel abliuu Dios dec didxldíc ná de diidxqui.

⁵ Dios quit bdeedtiny guelrnabee de ángli xtenny par inabeeeny rut idxapní stuby guelnabány cuby ni cazeetni, ⁶ te pur nuu tuby lat lo xquiits Dios rut guu ni gunii:

Dios, ¿túlesaquiy binguichliu ningui renelaazbiub?
¿Túlesaquiy lliin binguichliu ningui runbiu xgab pur laab?

⁷ Guu tuby tiop dxi laabiu bsaanbiu dec laab guchí gullieezru que de ángli,
per chiguld ax bsiáldbiub náb ni náb,
bguaadbiúb guelrnabee par inabeeb lo irate de ni banchuubiu

⁸ ax irate bsáanbiu laznaab.

Chi bdeed Dios laab guelrnabee par inabeeb lo irate, xíeteet quit xi biianti sin quit inabeeb masqui zeczi dunní gady iniátin dec canabeeb irairate.

⁹ Per nánní dec guu tuby tiop dxi ni gulliaru guc Jesús lo de ángli. Per anre anapny guelrnabee ne ráp bniety didxdoony pur guelzii ni gudeedny chi gutyny pur irate bniety, ne ziy guc pur ni rcaaz Dios dunní.

¹⁰ Pur Dios nuu irairate, ne laazacny rnabeeniy irate ni nuu, ax rcaazny gapny ziény lliinny

llayabaa. Pur ningui, pur guelzii ni gudeed Jesucrist bialo bzuubny xtiidx Dios, ax pur laatisny azelee idxapni perdón. ¹¹ De bniety ni anania nez lo Dios, pur Jesucrist ningui ananiadeb. Chiy zecli Jesucrist ne de bniety ni anania pur laany, tubyzi Dios rac xtagdeeb. Pur ningui, quit rtiuloti Jesucrist raipny laadeb: De betsa. ¹² Zecqui ni cá tuby lat lo xquiits Dios rut rnii:

Nare güenia de betsa diidx pur laabiu,
ne chi idxasaadeb ax guuldda de cant ni izubyaa laabiu.

¹³ Ziyza guniiny:

Diostisy zenelaaza gacné naa.

Ne guniizacny:

A nare zuguaníaa de lliinia ni bguaad Dios naa.

¹⁴ Ne zec ni tubylote de riny ne de beel ná bniety guichliu, ziyzaquiy guc Jesucrist chi beedny lo guichliu par güelee gutyny, ax pur guelguty xtenny baanny gan lo guelrnabee ni gúp bindxab par guelguty. ¹⁵ Ziy xquel baanny par bldány de bniety lo guelnadxiby xte guelguty, laadeb ni iduibte ni nabánydeb rdxibdeb guelguty zecpacza ni rdxiby bniety xlámni. ¹⁶ Te pur laany quit beedtiny lo guichliu par gacnény de ángli sino que beedny par gacnény de ni reldilaaz zec ni güeldilaaz Abraham Dios. ¹⁷ Pur ningui, gucny zectiziac bniety guichliu, te par bdziny dxi gucny tuby bxoz ni sac lo Dios, bxoz ni rgá bniety ne ni rzuubza xtiidx Dios par güelee gudillyny pur de xtuld bniety. ¹⁸ Ne cun lagac laany gudeedny guelzii ne baanza bindxab pur nisaclony Dios, pur ningui laany zelee gacnény de bniety ni cayun bindxab pur gúndeb duld.

3

¹ Pur ningui de sáan, laat ni anát xpíny Dios, laat ni abcuaabeeny par gactí de lliinny, gulchané cuend Jesucrist laany ni nány Bxozroo ni roldilaazni, laany ni bxiaald Dios lo guichliu. ² Te pur Jesucrist bzuubpacny xtiidx Dios ni bcuabee laany zec ni bzuubza Moisés xtiidx Dios nez lo de bniety Israel. ³ Per mazru riáld Jesucrist didxdoo que Moisés pur ni mazru sacny, zecqui tuby bniety ni rzuub yuu, mazru rzubyaadeb laab que yuu. ⁴ Irate yuu nuupac tuby ni rzuubnì, per Dios baanny irate ni nuu. ⁵ Ne Moisés bzuubbì xtiidx Dios, baanbì sirví lony chi bteedbì xtiidxny lo de bniety Israel par gudixtee lodeb xa ná ni guedgac. ⁶ Per Jesucrist zec Llin Dios ni nány, laany rnabeeny lo irate xpíny Dios. Ne dunnìy nan xpíny Dios, belati chalaa izutipnén ni roldilaaznì sin quít choaclaaztin axtqui dxi ni gueed Jesucrist stuby.

⁷ Pur ningui, zec ni rnii Spíritu Sant:
Belati rindiagti xtiidx Dios andxiré,
⁸ quít sunadtit zec ni baany de ni quít nicuadiag
xtiidxny
chi baandeb prueb laany deni guzuguaadeb nez lo
yiubiz.
⁹ Ne ruy ná ni quít nicuadiagtì de to xpíngulti
xtiidx Dios
masqui gunádeb de milagrì ni baanny nez lodeb
iduibte cuarent iz nez lo yiubizqui.
¹⁰ Pur ningui, bdxichné Dios de bnietqui,
ax guniiny:
“Iríny xgab ni rundeb

nicli quit rundeb pur gacbeedeb xa rcaaza
gúndeb.”

11 Ziy xquel bchiichdeb Dios
ax baantipny xgab dec
aquit yiiutideb rut gapdeb guelrzilaaz xtenny.

12 Pur ningui, gulcualo laat de sáan, te par quit
chúu tuby de saat dec purzi de xgab ni quit illiu
xtenbi ni rcua chaldilaazbi, ax ibicáb lo xnez Dios
ni rbeznabány. **13** Güenru llillite gul lidx ne gul-
duzaclaaaz de saat laga nuuru tiamp, te quit chi-
gald aquitru rcuadiagtí xtiidx Dios pur ni abaany
duld gan laat. **14** Te pur belati anan xpiny Crist,
iduibtiamp te ná par izutipnén ni roldilaazniny
zec ni bioldilaazniny desde gulo.

15 Ne zec ni aguniia laat, lo xquiits Dios rnii:
Belati rindiagtí xtiidx Dios andxiré,
quit sunadtit zec ni baany de ni quit nicuadiag
xtiidxny gulalqui.

16 Ne, ¿tudey quit nicuadiag xtiidx Dios masqui
bindiagdeb ni guniiny? ¿Ta gati lagac de bniety
Israel ni gulée Moisés nez Egiptoy? **17** Ne, ¿ta gati
lagac laadebiy bdxichné Dios cuarent iz pur ni
baandeb duld, bsaclodeb laany ax ziendeb guty-
deb nez lo yiubiz? **18** Ne, ¿ta gati lagac de bnietquiy
raipy Dios dec abaantipny xgab quit yiiutideb rut
gapdeb guelrzilaaz xtenny, pur ni quit nicuadi-
agdeb xtiidxny? **19** Ziy xquel racbeen dec quit
niaptideb guelrzilaazqui pur ni quit güeldilaaztideb
ni raipy Dios laadeb.

4

1 Pur ningui, zec ni zeczi rdxapni promes
xte Dios dec sdxapni guelrzilaaz xtenny, ná par

icualon te quit gun rdxapldin promesqui ne chiy ax yáan tubyni ni quit gap guelrzilaazqui. ² Te pur dunní abindiagní de didxzaac xte Dios zectiziac laadeb, per laadeb xíteete parti bindiagdeb de didxzaacqui, pur ni quit güeldilaaztidebni. ³ Per dunní ni abioldilaazni xtiidx Dios, ardxapni guelrzilaazqui, per pur de ni quit reldilaaz ax gunii Dios:

Pur ni bchiichdeb nare ninguiy abaantipa xgab dec quit gaptideb guelrzilaaz xtena.

Dios desde chi gurixti guichliu blduullny xtsiinny ⁴ zecqui ni rnii tuby lat lo xquiitsny pur dxi ni rzilaaz bniety:

Chi bialo blduull Dios irate xtsiinny, ax ni rac gadz dxi bzilaazny.

⁵ Per par de ni bsaclo laany ax guniiny: Quit chúuti dxi gapti guelrzilaaz xtena.

⁶ De ni bindiag gulo xtiidx Dios, quit güptideb guelrzilaazqui pur ni quit bcuadiagtideb xtiidxny, per zeczi nuuru ni rieedx gap guelrzilaazqui. ⁷ Pur ningui, chi gudeed pieny iz, Dios gubíi gulecány stuby dxi ni ná andxiré. Ax zecqui ni aguniin dec to rey David guniib tuby lat lo xquiits Dios:

Belati rindiagtí xtiidx Dios andxiré, gulgaany cuend xtiidxny.

⁸ Te pur belati pur Josué niap de bniety Israel guelrzilaaz, Dios quit nibíti nizeetny stuby dxi.

⁹ Pur ningui axt hórandxire a guelrzilaazqui nuu par de xpíny Dios. ¹⁰ Te pur elqui ni ráp guelrzilaaz xte Dios, rzilaazbi xte irate de ni rlilob rquiiny gúnbi par gacbi xpíny, rápbi guelrzilaazqui zec ni bzilaaz Dios chi blduullny xtsiinny. ¹¹ Pur ningui, ná par idxanni pur idxapni guelrzilaazqui te par

quit tu gún zec ni baany de ni quit bcuadiag xtiidx Dios.

¹² Te pur xtiidx Dios nabánni ne napni guelrnabee. Mazru raaizni que tuby spad ni cá iroplate lonii, raaizni láani almi ne spírit xte bniety. Axt láani dzit ne axtpacza láani tut raaizni, ax pur laany racbee bniety la güen o la mal ná ni rcaazbi gúnbi. ¹³ Xíteete ni banchuuti Dios quit chaleeti igaats lony, te pur laany irairate caguaany ne laaniy ni teru ideedni cuend.

¹⁴ Pur ningui, zec ni ardxapni tuby bxozroo ni ráp guelrnabee, ne laaniy Jesucrist Llin Dios ni arbez llayabaa, ná par chalaa izutipnén ni roldilaazniny. ¹⁵ Te pur Jesucrist laany ni nány bxozroo xtenni zelee gacnény dunní par quit gún duld gan dunní. Te pur laany ziyza gudeedny irlalote guelzii zecac ni cadeedni, per laany quit guuti dxi niunny duld. ¹⁶ Pur ningui, cun confianz azelee ibiin inaabni lo Dios ni rcaaz dunní par ilaslaazny dunní. Ax pur guelrcaaz xtenny, laany zacnény dunní hor ni rcaazni tu gacné dunní.

5

¹ Irate de ni rdziny rac bxozroo ni rnabee lo irate de bxoz, Dios rcuabeeny laab lo bniety guichliu par inaabbí lo Dios pur bniety. Chiy laab rdeed bniety de gun par Dios ne de ladxaa ni ná par gaty pur de xtuld bniety. ² Ne cun bniety guichliuzaquiy bxozqui, ax nánbi xa rdeed bniety. Pur ningui relee rápí pacency de bniety ni quit gánti xi run, ne de bniety ni run duld gan pur tuby guelguzacan. ³ Ne cun ziyza ruuza chi runza bxozqui duld ningui ax rguinzacbi tuby ladxaa

zec tuby gun par Dios pur de xtuldbi, zectiziac ni runzacbi pur de bniety.

⁴ Ne ruteete quít tu chaleeti inii gac bxozroo ni rnabee lo irate de bxoz, sino que Dios ná ni rcuabee laab zec ni bcuabeeny Aarón.

⁵ Ziygaczaquiy guc cun Jesucrist, gati laatin y guniiny gacny zec tuby bxozroo par dunní sino que Dios bcuabee laany, chi guniiny:

Liú noo Llingaana, ne desdi anre isienia dec liúy Lliinia.

⁶ Ne ziyza rnii stuby lat lo xquiits Dios pur laany: Liú noo bxoz par chazy zec ni guc Melquisedec bxoz.

⁷ Chi gubány Jesucrist lo guichliuré quesentiand axtpacza ruunny guriidx gunaabny lo Dios ni zelee nildá laany lo guelguty ni gudeedny. Chiy Dios baanny cuend Jesús bdeedny laany valor pur ni bzuubny irate xtiidx Dios. ⁸ Masqui Lliin Dios laany, per bseedny bcuadiagny diidx masqui guelziitisy ni gudeedny. ⁹ Ne pur ni bialo baanny irate ni rcaaz Dios gúnny, ningui pur laany par chazy anuu perdón par irate de ni rcuadiag xtiidxny. ¹⁰ Ax Dios ná ni bcuabee laany gacny bxozroo zec ni guc Melquisedec bxoz.

¹¹ Zienziru ni nuu iniia laat pur ziy, per la nagán par quixtia lot zec ni rcaaza pur ni la niny racbeet.

¹² Agulalíy bambeet xtiidx Dios, anre belrulati relee, laatiy ariáld iliuut stuby de bniety, per ziy laat zeczi rquiiny chúu ni ibíi iseед laat de xtiidx Dios ni bseedti gulo. Laat cadeedti zec tuby bdoo ni rée púrzi lech xlat ni iquiinby iralote. ¹³ Ne irate de ni ná zec tuby bdoo ni gady iquiinti iralo, quít xo gacbezaactideb zelo xtiidx Dios. ¹⁴ Per de

bniety ni zélaa cayabee xtiidx Dios, laadeb nádeb zec de ni arquiiny irate pur ni aracbeedeb cun ni ná güen ne cun ni ná mal.

6

¹ Pur ningui, ná par chalaa idxanni pur gacbeerun xtiidx Jesucrist xlat ni ibíi idxaicquini iseedni de xtiidxny ni bseedni gulo. Güenru ziy xlat ni iseedtisni xa xquel isaanni de mal ni bdxanni gulo, o xa xquel choldilaazni Dios, ² o xa xquel tiubnis bniety, o pur guelrzubnaa quia bniety, o xa xquel isbány Dios de binguty, o xa xquel gún Dios guelgurtisy chi idziny dxi ni ideedni cuendny, ³ güenrupac chalaa iseedrun xtiidxny. Ne nadios chalee idxanni ziy.

⁴ Te pur de ni anán pur Dios, de ni agucbee pur de cos xte llayabaa, de ni anán xi run Spíritu Sant, ⁵ ne agucbeedeb dec güen ná xtiidx Dios, ne anándezeb xa xquel teru inabee Dios, ⁶ ne chiy ax quit nadeb chaldilaazdeeb de didxzaac xte Jesucrist, laadeb a quesentiand nagán par yiudeb lo xnez Dios, te pur digapac choniin dec rbíi cacuaadeb Jesucrist Lliin Dios lo cruzy par gún bniety burlí laany. ⁷ Bniety guichliu ná zec tuby ladaa guichliu ni rée irate nisguia ni riab, chiy belati rac guelnazaac loni par bniety ni run dzínni ax runldee Dios quiani. ⁸ Per belati púrzi de yaguích ne de quandxab rldieny loni chiy quit xi illiútini, ax zélaa cadzingax castigu par laani ne castiguqui ná dec chaaicquini.

⁹ Quit caniitin ziy pur laat te pur dunní nánni dec güenqui cayuntí, zenuuctí ni riáld gúntí par ldát lo castigu xte Dios. ¹⁰ Ne laany quit nátiny

tuby Dios ni quit run zec ni riáld par yianlaazny de cos güen ni abaanti cun irateru zec ni abliutny dec rcaaztiny, ax gucnét ne zélaa cayacnét de saniroldilaazni Jesucrist. ¹¹ Per dunní rcaazni chalaá gúnti ziy axt lúltmi dxi, sin quit chaxaclaaztit, te par yáldti ni canuut yáldti. ¹² Quit gaaxtit sino que gulgaany zec ni baany de ni güeldilaaz Dios sin quit niaxaclaaztideb par icáadeb ni gunii Dios icáadeb.

¹³ Chi baany Dios promes cun to Abraham, laany baanny jurar pur lagac laany te pur quítru tu stubyti mazru sac que laany, ¹⁴ ax raipny Abraham: “Nare guldípaca zunldiaa quiu ne quesentiand de familroo gacu.” ¹⁵ Chiy Abraham gúpbí paciency, quit niaxaclaaztib ax cuáab ni raipy Dios ideedny laab. ¹⁶ Chi run bniety jurar, laadeb rundeb jurar pur tuby ni mazru sac que laadeb, te par yíany dec didxldícpac zundeb ni rniiideb. ¹⁷ Anre ziyytiziaczaquiy, pur ni rcaaz Dios iliuuny de ni teru icáa ni guniiny, dec quit chúuti dxi ichuny xgabny pur promes ni baanny, ningui baanny jurar. ¹⁸ Tiop cos ni quit xo ibilyti baany Dios, laany baanny promes ne baanny jurar ax nánni dec laany quit rueetiny dixú. Ziy xquel quesentiand rcáan valor dunní ni rbinuun Dios par gacnéy dunní, pur ni ardxapni confianz dec zac zec ni aguniiny. ¹⁹ Ne pur ni nánni dec zac zec ni agunii Dios, pur ningui rzutipnén xtiidxny zecpacza ni rzutipné tuby ganch guiib tuby barcu. Ne guelrzutipqui desdi llayabaa zéedni ²⁰ rut abiiu Jesús par bxalny nez par dunní, laany ni anáy bxozroo par chazy, saa bxoz ni guc Melquisedec.

7

¹ Melquisedecqui laab gucb*i* rey xte Salém ne bxoz xte Dios ni rbez llayabaa. Chi bza Abraham lo guerr xte ni baanb*i* gan lo de rey ni güetldnéb, chiy güechalo Melquisedec laab ax banldeeb quia Abraham. ² Chiy de lo irate de cos ni baany Abraham gan lo guerrqui, laab baanb*i*ní par ts*i* ax bdeedb*i* tuby partqui Melquisedec. Melquisedec-qui zelo “rey ni run guelgurtisy zec ni riáld.” Ne cun gucb*i* rey xte guidx Salém ax niy zelo “rey xte guelnaldiulaaz”, te pur Salém zelo “guelnaldiulaaz.” ³ Melquisedecqui quit tu ganti tú rac xtadb*i*, xnanb*i* o tú de rac de to xp*ingul* gulalb*i*. Nicza quit tu ganti gúc gulb*i* ne gúcza gutyb*i*. Laab gucb*i* bxoz zeguaald zecac Jesús Lliin Dios, laany ni anány bxoz par chazy.

⁴ Ne quetal lliza sac Melquisedec chiy. Ningila axt to xp*inguln*i Abraham bdeed laab diezmi xte de irate ni baanb*i* gan lo de rey ni gudildnéb. ⁵ Ley rnii dec de bxoz Israel ni zá lo xfamily Leví napdeb nez icáadeb diezmi lo irate de bniety Israel, masqui tubyzi lo xfamily to Abraham zá iratecdeb. ⁶ Per Melquisedec, masqui gati lo xfamily Leví záb, per cuáab diezmi lo Abraham. Chiyru ax banldeeb quia Abraham ni guud de promes xte Dios. ⁷ Ne dunn*i* nánn*i* dec bniety ni runldee quia stuby bniety, mazru sacb*i* lo bniety ni runldeeb quiani. ⁸ Irate de bxoz ni rcáa diezmi raitiacdeb zecac dunn*i*. Per Melquisedec ni cuáa diezmi lo Abraham, zeczi riatb*i* zecac tuby ni zeczi nabány. ⁹ Anre digapac choniin dec Leví cun de bxoz ni zéed lo xfamilb*i* de ni rcáa diezmi anre, nédeb bdeeddeb diezmi Melquisedec hor ni güechalo Melquisedec

to xpingulní Abraham. ¹⁰ Te pur chi güechalo Melquisedec Abraham, masqui zeczi gady chúuti Leví, per xcul Leví rac Abraham.

¹¹ Belati pur de bxoz levitas nialee niac bniety nania nez lo Dios pur ley ni guu par de bniety Israel, ax aquítru rquiinti níaad stuby bxoz ni beed zec Melquisedec, gati zecti Aarón. ¹² Ne chi biiu bxoz ni beed zec Melquisedec ax bchuza ley, ¹³ te pur Xtadní Jesucrist laaniy nány bxozqui. Per gati lo xfamilti de bxoz zány sino que lo irinqui family, ne nic tuby de xfamilny quit niacti bxoz. ¹⁴ Dunní nánní dec lo xfamily Judá zá Xtadní Jesucrist, ne Moisés quit xi guniitib pur familqui chi guniib tú de gac bxoz.

¹⁵ Per güeldíte dec Jesucrist laany nány bxoz zeguaald zecac Melquisedec, ¹⁶ pur ni gati lo xfamilti Leví zéedny zec ni rnii ley par gac bniety bxoz, sino que nány bxoz pur ni napny guelrnabee ibánnny par chazy. ¹⁷ Te pur squé rnii lo xquiits Dios pur laany:

Liú anoo bxoz par chazy, saa bxoz ni guc Melquisedec.

¹⁸ Ziy xquel gubicá ley tuby lad pur quit nilliútini niun bniety zec ni rnabeeni, ¹⁹ (quit nialeeti niun leyqui gan nibányzaac bniety nez lo Dios). Per xlat leyqui, güenru ná guelreldilaaz ni rdxapni, te pur, pur guelreldilaazqui ardxapni nez par cun Dios.

²⁰⁻²¹ Gulalqui chi biiu de bniety de bxoz, quit xi jurarti baany Dios. Per chi bcuabee Dios Jesús gacny bxoz, Dios baanny jurar zec ni cá tuby lat lo xquiitsny rut rnii:

Xtadni Dios abaanny jurar ne quit ichutiny xgabny:

“Liú anoo bxoz par chazy
saa bxoz ni guc Melquisedec.”

²² Ziy xquel nánni dec güenrupac ná nez cuby ni bxal Jesús par cun Dios. ²³ Gulalqui zieny guc de bxoz pur ni rdzindxipac ni ratydeb ax quit xo gactideb bxoz par chazy. ²⁴ Per Jesús cun quit chúuti dxi gatyny ax quit teedti ni nány bxoz. ²⁵ Pur ningui, relee rldány bniety lo castigu xte Dios, de bniety ni rcaaz gap nez par cun Dios pur laany, te pur laany napny guelnabány par chazy par inaabny lo Dios pur laadeb.

²⁶ Pur ningui laaniy bxozroo ni rquiinni gacné dunnedni. Te pur laany nány sant, quit xi maldi runny, nania naniany, irinqüipac nány par binduld, ax rbezny llayabaa cuee Dios. ²⁷ Laany quit rquiinti gúnny zec ni run de bxozroo dec llillite rguindeb de ladxaa zec tuby gun par Dios, nidoote pur lagac de xtulddeb chiyru pur de xtuld stuby de bniety. Per Jesús cun tuby güelt bdeedny laany gutyny pur de xtuldní, quitru rquiinti gatyny stuby. ²⁸ Pur ley güelee guc de bniety bxozroo masqui quit rialoti naniadeb nez lo Dios. Per chiguld cun tuby jurament Dios bcuabeeny Lliinny gacny bxozroo, laany ni rialo naniany nez lo Dios iduibtiampete.

8

¹ De lo ira ni cadxueen ni mazru sac ná dec Jesucrist ná bxozroo xtenni, laany ni azubny llayabaa lad naldí xte Dios ni rnabee. ² Ruy anuuny de bxoz, laniudoo ni bzuub Dios, gati binguichliuti. ³ Irate de bxozroo lo guichliuré xtsiñdeb ná renédeb de

gun ne rguindeb de ladxaa zec tuby gun par Dios. Ziygacza Jesucrist ni ná bxozroo xtenni nuuza xi bdeedny Dios. ⁴ Ne belati zeczi zuguaa Jesucrist lo guichliu nicli quít niactiny bxoz, pur ni anuu de bxoz ni rené de gun lo Dios zec ni rnabee ley ni bsanné Dios Moisés. ⁵ Per irate ni run de bxoz lo guichliuré, naizdeni zec tuby blda, zec tuby seny xa ná de cos ni nuu llayabaa. Dunní nánni dec naizdeni tuby seny te pur chi zéed izuub Moisés yudoo, chiy raipy Dios laab: “Bguiaapac te gúnu irate zectisy ni abliuua liú quia dany Sinaí.” ⁶ Per mazru güen ná ni run Jesucrist laany ni abiáldny nánya bxozroo xtenni, te pur mazru güen ná nez cuby ni bxalny par idxapni nez par cun Dios. Ne pur nez cubyqui ax mazru güen ná de promes xte Dios par cun bniety.

⁷ Belati pur ley nialee nibányaac bniety nez lo Dios, ax aquít rquiinti níiu tuby nez cuby. ⁸ Per Dios gunány dec quít cayunti bniety zec ni ná par ax guniiny:

Nare rniiia dec teru idziny dxi ixala tuby nez cuby par de bniety Israel ne de bniety Judá.

⁹ Per nez cubyqui quit nátiny zec ley ni bsannía de to xpingultí

chi guliiadeb Egipto.

Ne pur ni quít nicuadiagdeb xtiidxa
ningui gulelaazadeb, gunii Dios.

¹⁰ Ne ziyza guniiny:

Squé xquel abían diidx gac cun de bniety chi
idziny dxi:

Láani quiadeb isáana de ley xtena ne
láani lazdoodeb icuáani.

Chiy nare gaca Xtiosdeb,

ax laadeb gacdeb de xpinnia.

¹¹ Dxiqui aquitru rquiinti iseed de bniety saani
nicliza betsdeb par gumbeedeb Dios,
te pur iratedeb zumbee nare,
desdi mazru bichiin axtqui mazru guroo.

¹² Chiy nare zuna perdón irate de mal ni abaan-deb,

ne quit chúuti dxi chanelaaaza de xtulddeb.

¹³ Chi gunii Dios ixalny nez cubyqui esqui pur
aquitru illiúti nez gulal ni gúp bniety par cun
laany, ne ni aquitru illiúqui ziub nitloni.

9

¹ Dunní nánni dec chi güenuu bniety ley ni caniin
ná nez gulalqui, lo leyqui zéed xa riáld ito bniety
Dios, ne xa riáld gúndeb tuby yudoo lo guichliuré.

² Yudooqui guzaaby tuby cortin láanni par gucni
tiop láani. Tuby láanni ni ná nez ruu puert, ruy
bdialá rut Nadá ax láanqui guzuub candliery cun
milly ni guzuub de guechtily ni abiacldee. ³ Chiy
stuby láanni, dets cortinqui bdialá rut Quesen-
tiand Nadá. ⁴ Láanqui guu tuby bcuu de or rut
ruu guxaal ne tuby caj ni bdialá caj xte de promes
xte Dios. Cajqui nacuni or zecli nez láanni ne nez
detsni. Ax láani cajqui guchuu chon cos: De guia
ni cá irate tsí mandamient xte Dios lonii, var xte
Aarón ni bllich, ne tuby camplory de or ni guchuu
maná. ⁵ Chiy quia cajqui guzuub tiop figur xte de

ángli ni lá querubines ax cun xiildeb rtaagudeb
rut rtiuub bxozroo riny xte de ladxaa pur de xtuld
bniety. Per pur anre quit rquiinti iniirupaca laat
pur de cosqui.

⁶ Chi gulull baandeb irate zec ni riáld gac tuby yudoo lo guichliuré, chiy llillite biiu de bxoz laniudoqui per rutzi bdialá rut Nadá, ruy regaanydeb ni riáld gúndeb. ⁷ Per stuby láanni rut bdialá rut Quesentiand Nadá, tubyzi bxozroo riiu ruy tuby lo tuby iz. Ne quit xo yiutib sin quit chanéb riny xte de ladxaa par gún Dios perdón de xtuldbi ne de xtuld de bniety. ⁸ Pur de cosré rliuu Spíritu Sant dunní dec lalzi calliú laniudoqui rut bdialá rut Nadá, quit gópti bniety nez yiudeb rut bdialá rut Quesentiand Nadá. ⁹ Irate de cosqui naizdeni tuby ejempli par dunní andxiré, te pur de gun ne de ladxaa ni güené de bniety par Dios, quit nilliútideni par nialo niziendeb dec ananiadeb nez lo Dios. ¹⁰ Irate de costumbri ni gúpdeb zecli pur ni iquindeb, ni guéedeb ne iraloteru ni riáld gúndeb par iziendeb laadeb nania, niy ná ni gunabee ley gún bniety axtqui dxi ni bchu Dios irate.

¹¹ Te pur anre abeed Jesucrist, laany ni nány bxozroo par dunní, ax pur laany ardxapni ne sdxapzacni de ni agunii Dios idxapni. Ne mazru güen ná laniudoo rut abiuny, mazru sac yudooqui pur ni quit nátini lo guichliuré nicliza quit guchuutini pur bniety guichliu. ¹² Jesucrist abiuny laniudoo rut Quesentiand Nadá, per gati cun rinti xte de bserr o xte de chiv sino que cun rínpac xtenny. Laany cun tuby güelt biiuny, quit rquiinti gúnni ziyo stuby ax pur laany ardxapni perdón par chazy. ¹³ Guloqui, riny xte de chiv o xte de gún o de dé guaaicquiza xte de vagueen rtiuub bxoz quia de bniety par rziendeb dec ananiadeb. Anre belati ziycla rziendeb dec ríadeb, ¹⁴ latixcu cun

riny xte Jesucrist quit iziienñi dec ananian nez lo Dios xte de xtuldní, par chalee idxanni zec ni rcaaz Dios ni rbeznabáy. Te pur, pur guelrnabee xte Spíritu Sant, Jesucrist laany ni quit xi duldti baanny, bdeedny laany zec tuby gun par Dios.

¹⁵ Pur ningui, pur Jesucrist ardxapni tuby nez cuby par cun Dios. Te pur, pur guelguty xte Jesucrist anuu perdón par de xtuldní ne xtuld de ni güenuu ley, ax irate de ni a ná xpíny Dios ziy xquel icáan de ni aguniiny idxapni par chazy. ¹⁶ Te pur zecqui tuby bniety ni runchuu tuby guiits tú de yanné de xixtenbi, quit illiúti guiitsqui axtisy chi agutybi. ¹⁷ Lalzi nabánybi quit illiúti guitsqui sino que axtisy chi agutybi. ¹⁸ Pur ningui, desdi gulalqui par guzulo blliú ley ni bsanné Dios Moisés, laadeb gudindeb tuby tiop de ladxaa par bdiia riny. ¹⁹ Te pur chi gulull gudixtee Moisés lo irate de bniety irate ni zéed lo xley Dios, ax cuáab guichllíly culory xnia bcuaabni quia tuby lliiz yag ni lá hisopo. Chiy bzeebni lo nis ni nuuch riny xte de bserr cun xte de chiv ax btiuubbini quia libri xte ley cun quia irate de bniety ²⁰ guniigab: “Rínré ná seny dec abniídx Dios laat xleyny par gúnti cumplirni.” ²¹ Ziyza btiuubbí ríngui laniudoo cun quia irate de cos ni blliú par de bxoz laniudooqui. ²² Leyqui casi irate gunabeeni yacldee cun riny par yíany dec ananiadeni nez lo Dios, te pur sin riny quitti perdón xte de duld.

²³ Pur ningui, par yíany dec anania de cos ni blliú par de bxoz laniudooqui, gúpdeb que gudindeb de ladxaa par bsiacldeedeb de cosqui. Per de cosqui naizdeni tuby seny xte de ni nuu llayabaa, te pur

par de ni nuu llayabaa rquiiny riny xte tuby ni mazru sac que de ladxaa. ²⁴ Ne Jesucrist gati laniudooti ni bzuub bniety guichliu biiuny, yudoo ni naizy tuby seny xa ná llayabaa sino que laany abiiuny llayabaa rut caniiny pur dunní lo Dios. ²⁵ Jesucrist quit rquiinti niatyny zienzi güelt pur de duld, quit baantiny zec ni baany de bxozroo dec gazubizte biunédeb riny xte de ladxaa laniudoor rut bdialá rut Quesentiand Nadá. ²⁶ Te pur belquitiy, zienzi güelt rquiiny niatyny desdi chi gurixti guichliu. Per ziy ax chi bdziny dxi beedny, laany cun tuby güelt bdeedny laany gutyny par idzicány duld. ²⁷ Zecqui irate bniety tubyzi güelt ratydeb, chiyrú zéed ni ideeddeb cuend Dios. ²⁸ Ziygaczaquiy Jesucrist cun tuby güelt bdeedny laany gutyny par gudillyny pur de xtuld bniety. Ax chi gueedny stuby aquit gueedtiny pur duld, sino que laany gueedny par chanény de ni canuu laany.

10

¹ Ley ni bsanné Dios Moisés naizni tuby seny xte de ni gac, per gati ziysi gac ni ná par gac. Te pur masqui gazubizte guty de ladxaa par Dios zec ni gunabee ley gún bniety, per quit guuti dxi niziendeb dec abialo naniadeb nez lo Dios. ² Te pur belrulati niziendeb dec ananiadeb cun tuby güelt ni gudindeb de ladxaa par Dios, ax aquitru rquiinti niundeb ziy pur ni anández dec agull pur de xtulddeb. ³ Per ziy ax quit niziientideb ziy sino que gazubizte renelaazdeb de xtulddeb chi rguiñdeb de ladxaa par Dios, ⁴ te pur riny xte de gún ne xte de chiv quit xo idzicátini xtuld bniety.

⁵ Pur ningui, chi beed Jesucrist lo guichliu laany raipny Dios:

Laabiu quit rcaaztibiu riny xte de ladxaa, nicliza irateru ni redné bniety par laabiu, niy bguaadbiu nare cuerpi ni napa lo guichliuré.

⁶ Quítru rcaaztibiu ni rzaaicquideb de ladxaa par laabiu, nicliza riny xte de ladxaa ni rednédeb pur de xtuld-deb.

⁷ Pur ningui, ax guniia:

“A nare, Xtada Dios, zelda par gúna zec ni rcaazbiu, zec ni cá lo librí pur naa.”

⁸ Jesucrist nidoote guniiny dec Dios quit rcaaztiny riny xte de ladxaa, nicliza irateru ni rené bniety par laany, nicliza ni rzaaicquideb de ladxaa pur de xtuldddeb zec ni rnii ley gúndeb. ⁹ Chi gulull gunii Jesús ziy, chiyru guniizacny: “A nare, Xtada Dios, zelda par gúna zec ni rcaazbiu.” Ziy xquel blduull Jesucrist guelrenuu de costumbrí ni rnii ley ax bxalny stuby nez cuby par cun Dios. ¹⁰ Anre ax ananian nez lo Dios pur ni baany Jesucrist zec ni rcaaz Dios, bdeedny laany gutyny pur de xtuld bniety cun tuby güelt par chazy, quit rquiinti gúnny ziy stuby.

¹¹ Irate de bxoz Israel lillite zuldideb cayundeb irate ni rnabee ley gúndeb, chiy lilliteza rguindeb de ladxaa par Dios. Ne masqui zienzi güelt rundeb ziy, per quit xo idzicáti guelrguiny de ladxaaqi de xtuld bniety. ¹² Per Jesucrist cun tuby güelt bdeedny laany gutyny pur de xtuld bniety, quit rquiinti gúnny ziy stuby. Ax guriny lad naldí xte Dios ¹³ rut canuuny idziny dxi ni inabeeny lo irate

de ni rdxichnē laany. **14** Te pur laany cun tuby güelt ni bdeedny laany gutyny pur de xtuld bniety, ax par chazy anania irate de ni reldilaaz laany. **15** Ne dunní nánní dec didxldíy te pur, pur Spíritu Sant zeed de diidx ni cá lo xquiits Dios dec Dios guniiny:

16 Squé ná xquel abían diidx gac cun de bniety chi idziny dxi:

Láani quiadeb isáana de ley xtena
ne láani lazdoodeb icuáani.

17 Ne guniizacny:

Quit chúuti dxi chanelaza de duld
ne iraloteru de mal ni abaandeb.

18 Ax zec ni anuu perdón par de duld, quítru rquiinti guelrguiny de ladxaa pur duld.

19 Pur ningui, de saniroldilaazní Jesucrist sin dxiby azeleee idzinní rut rbez Dios pur riny xte Jesucrist, **20** te pur chi bdeedny xcuerpiny par gutyny, bxalny tuby nez cuby ni zedné guelnabány par dunní. **21** Anre zec ni arnabee Jesucrist dunní, laany ni nány bxozroo llayabaa **22** ax dibyquia dibylaazní azalee ibiin nez lo Dios cun tuby guelreldilaaz ni guldípacní roldilaazníny, cun tuby guelrieny nania sin de mal xgab ne cun tuby cuerpi ni abía xte de duld, zecpacza chi teste guudyní cun nisnia. **23** Pur ningui, ná par chalaazutipnén ni roldilaazní Dios, te pur laany zunny zec ni aguniiny. **24** Ná par idxanní xgab xa xquel chalee iguzaclaazní de sáan par icaazní de saa bnietni ne par idxanní ni ná güen. **25** Quit náti par idxanní zec ni run de bniety ni aquítru reti rut rdxasaa iraru de sáan par gacbeerudeb xtiidx Dios, sino que ná par iguzaclaazní de sáan, ne

mastecru anre ni arguaan dec azeddzingax dxi ni
gueed Jesucrist stuby.

²⁶ Te pur belati agucbeen de didxldí xte Jesucrist ne quit idxanni cuendny sino que mazru chalaan idxanni duld, ax aquitru tu partí chalee gacni perdón. ²⁷ Ni acanuutisy dunní ná tuby guelgurtisy cuendroo xte Dios, tuby bal rut yáld de ni quit rcuadiag xtiidxny. ²⁸ Chi quit baany tuby bniety zec ni rnabee ley ni bsanné Dios Moisés, ne guu tiop o chon testigu dec quit baantib zec ni rnabee leyqui, ax quitru guuti nez par Idáb lo guelguty ni riálbi. ²⁹ Anre gulgaanyzi xgabti, ¿tal lliza mazru castiguroo yáld bniety ni rsaclo Spíritu Sant ni racné dunní, bniety ni run xgab dec quit xi sancti Llin Dios, ne runbi despresy riny xtenny ni rliuu dec zac zec ni absáan Dios diidx gac, riny ni rsía bniety xte de duld? ³⁰ Dunní nánní dec Dios guniiny: “Nare riáld gúna guelgurtisy, nare isiáldab ni riálbi.” Ne ziyza: “Dios ná ni icáa cuend pur ni cayun bniety.” ³¹ ¡Ax quesentiand cuendroo ná yáld bniety castigu xte Dios ni rbeznabány!

³² Per laat, gulchanelaaaz xa guc chi teste bambeet de didxldí xte Jesucrist. Laat belaazti de guelzii trabaju ni gudeedti. ³³ Nuut iralote guelzii bteed bniety laat, ne baandeb burlí laat nez lo bniety, ne nuuzacti quit gulelaaztit de ni gudeed ziy. ³⁴ Quit gulelaaztit de saat ni biaagu, ne ziyza chi bdzicá de bniety xixtentí laat güelaa guzaclaaazti pur ni nánti dec mazru sac ni napti llayabaa, ne de ni rápti ruy ná ni güelaaz par chazy. ³⁵ Pur ningui, quit isaanti ni reldilaazti Jesucrist te pur, pur guelreldilaazqui quesentiand güen ná ni icáat.

³⁶ Rquiiny gapti paciency te par chalee gúnti zec ni rcaaz Dios, ax ziy xquel icáat ni aguniiny iníidxny laat. ³⁷ Te pur lo xquiits Dios rnii:

Ziub, quesentiand ziub gueed ni ná par gueed, quit gacldaatiny.

³⁸ Ne bniety ni nabány zec ni rcaaza, iduibtiampete ni nabánybi reldilaazbi nare. Per belati isaanbi ni reldilaazbi nare, ax aquitru saclaaznétiab.

³⁹ Per dunní quit nátin zec de ni rsaan ni reldilaazdeb Jesucrist ax riáldeeb castigu, sino que dunní nan de ni guldípac reldilaaz laany par quit idxáldni castigu.

11

¹ Anre, ¿xiy guelreldilaaz? Guelreldilaaz ná dec rialo rdxapni confianz dec zac zec ni canuun gac, ne dec guldípacni roldilaazni ni nicli quit caguiatín. ² De to xpíngul gulalni bianzaacdeb nez lo Dios pur ni güeldilaazdebny.

³ Zec ni roldilaazni Dios, dunní nánni dec cun xtiidxny banchuuny yabaa, guichliu ne irateru de ni rguiáan, xíteete quit banchuutiny cun tuby de cos ni rguiáan anre.

⁴ Pur ni güeldilaaz Abel Dios ningui güenru ná gun ni bdeedbiny que ni bdeed Caín, ax bianzaacbí nez lo Dios ne cuáany de ni bzalaazbi par laany. Ziy xquel masqui aguty Abel, per zélaa riat xa xquel güeldilaazbi Dios.

⁵ Pur ni güeldilaaz Enoc Dios ningui quit gutytib, nabánybi zéb llayabaa parzi aquitru bdxialti de bniety laab pur ni azéne Dios laab. Per anste ni chanény laab, lo xquiits Dios rnii dec bdxulaazny

zec ni gubánybi. ⁶ Ne ruteete quit tu chaleeti gún zec ni rdxalaaz Dios belati quit reldilaazbiny. Tutix ni rcaaz gap nez par cun Dios ná par chaldilaazbi dec nuu Dios, ne chaldilaazzacbi dec laany rdeedny ni rniiny ideedny de ni rguíly laany.

⁷ Pur ni güeldilaaz Noé Dios ningui chi raipny laab gac de ni gady iniátib gac ax bcuadiagbi diidx, banchuub tuby barcu par ldáb cun de xfamilbi lo ni gunii Dios gac. Chiy pur guelreldilaazqui bíeny dec irate bniety guichliu riáld castigu ni gunii Dios, chiy Noé ax bianzaacbí nez lony pur ni güeldilaazbi xtiidxny.

⁸ Ziygacza Abraham pur ni güeldilaazbi Dios ningui bcuadiagbi diidx chi raipny laab idiiab ladxbí par chiab rut icáab guichliu ni ideedny laab, ax bdiiab ladxbí sin quit gántib caliti ruy chiab.

⁹ Pur ni güeldilaazbi Dios, laab gulezbi zec binzít lo liu ni gunii Dios ideedny laab. Gulezbi láani de carp guidy, ziytziaczsa Isaac ne Jacob, laadeb ni riáldzadeb guichliuqui. ¹⁰ Abraham gulezbi ziy pur ni nánbi dec teru chaldezbi láani guídx ni banchuu Dios, guídx ni quit chúuti dxi nitlo.

¹¹ Ziygacza Sara, pur guelreldilaaz xtenbi ax masqui anáb bingul par icáab bdoo, per guudbi juers par gacbi nan lo guichliu ax guu tuby llingaanbi pur ni güeldilaazbi dec Dios runpacny cumplir xtiidxny. ¹² Ziy xquel guc masqui quesentiand bingul a ná Abraham per gucibi de family. Quesentiand zieny de dependency xtenbi guu zecpacza de balgui llayabaa, zecpacza de yiully ruu nisdoo ni quit xo igabti.

13 Irate de bniety ni abzeetni axt gutydeb reldilaazdeb Dios, masqui quit gunátideb guc cumplir irate promes ni baany Dios cun laadeb, per pur guelreldilaaz xtendeb nándeb dec zac zec ni guniiny ax rzaclaazdeb. Laadeb nándeb dec tuby tiop dxizy zéeddeb lo guichliu gati par chazyti.

14 Ne de ni rnii ziy, ziy xquel rienldí dec zeczi caguiílydeb rut gac ladxpacdeb. **15** Te pur belrulati pur guichliu rut bdiiadebiy rundeb xgab, ax zelee niecquideb ruy stuby. **16** Per ziy, laadeb mazru rundeb xgab pur tuby lat rut ná mazru güen, mazru rundeb xgab pur llayabaa. Pur ningui Dios quit rtiulotiny nánny Dios xtendeb, ax abanzaacny tuby lat rut cuezdeb llayabaa.

17 Pur ni güeldilaaz Abraham Dios ax chi baany Dios prueb Abraham par niguinxúb llingaanbi Isaac zec tuby gun par laany, laab guzigueldbi masqui tubyzi Isaacqui rac lliinbi, ne masqui nánbi dec Dios raipny laab: **18** “Pur llingaanu Isaac idal zieny xfamiliu.” **19** Per Abraham güenéb cuend dec Dios napny guelrnabee axt par isbánny de binguty, ax casi digapac choniin dec gubíi gubány lliinbi stubiy chi gudeedbí pruebqui.

20 Ziygacza Isaac pur guelreldilaaz ni gúpbí Dios ax chi banldeeb quia de llingaanbi Jacob ne Esaú, guniib xa gac cun cad tubydeb. **21** Ziytiziac Jacob pur guelreldilaaz ni gúpzacbi Dios ziyza bguaadbí bendiciony iropte de llingaan Gusé chi apac mer gatybi. Chiy quia bastón xtenbi guzunaab gu-naabbí lo Dios. **22** Ziygacza Gusé pur guelreldilaaz ni gúpbí Dios, chi apac gatybi, laab guniib dec sdiia de bniety Israel Egipto, ax raipbi laadeb xa

gunnédeb de dzit xtenbi.

²³ Pur guelreldilaaz Dios, xtag ne xnan Moisés chi gulbi, laadeb bcuaatsdeb laab pur chon búiu pur ni gunádeb dec quesentiand garbi bdoó náb, ax quit bdxibtideb ni gunii rey dec gaty irate de bdoó.

²⁴ Ne chi guc Moisés bnietroo, pur guelreldilaaz ni gúpbí Dios, guudbí xgab quit nizigueldtib niacbi lliin llindxaap rey xte Egipto. ²⁵ Par laab, güenru gudeedbi trabaju cun de saa bniety Israelbi, xlat ni niunbi duld nibelaazbi laadeb par níapbí nitisy rcaazbi, de cos ni quit náti par chazy. ²⁶ Par laab mazru sac gudeedbi trabaju zec Crist xlat ni níapbí irate de guelnazaac xte Egipto, te pur mazru güenéb cuend de guelnazaac ni yáldbi lo Dios. ²⁷ Pur ni güeldilaaz Moisés Dios, laab bdiab Egipto, quit bdxibtib masqui bdxiiich rey xte Egipto. Laab guzutipbí lazupacza caguiaab Dios ni quit xo yianloti bniety.

²⁸ Ziyza pur güeldilaaz Moisés Dios, laab baanbi laní pascu, ax gunabeeb btiuub de bniety Israel ríny ruu puert lizdeb, te par chi gudeed ángli xte guelguty, quit niguinxútiny de llingangulo de bniety Israelqui. ²⁹ Pur güeldilaaz de bniety Israel Dios, laadeb gudeeddeb zecac lo yiubiz rut bllal nisdoo ni lá Nisdoo Xnia. Per chi baany de bniety Egipto pur nideeddeb, horqui gubií bdxasaa nisdooqui chiy guaapy nis quiadeb ax gutydeb.

³⁰ Pur ni güeldilaaz de bniety Israel Dios, chi bialo gadz dxi ni cacuaadeb güelt guidx Jericó, ax biab de pader ni ná iduibrondote guidxqui. ³¹ Ne Rahab ni guc tuby gunaadxbab láani guidx Jericó, pur ni güeldilaazbi Dios, quit gutytib chi guty iraru de bni-

ety ladxbi ni quit nicuadiag diidx, te pur baanbi recibir de bniety Israel ni güeldaats guidxqui.

³² Anre, ¿xiru iniaa laat? Quit galdti iniaa laat pur Gedeón, Barac, Sansón, Jefté, David, Samuel ne pur de profet. ³³ Iratedeb güeldilaazdeb Dios ax baandeb gan lo zienzi de naciony, baandeb guelgurtisy zec ni riáld, gunádeb guc cumplir ni raipy Dios laadeb ne bchiideb ruu de lióny. ³⁴ Ziyza guudeb láani balroo ne quit xi guctideb, guládeb lo guelguty xte spad, cuáadeb juers chi lazu quit xi juersti napdeb, guzutipdeb lo guerr ne bxuuindeb de binzít ni gudildnádeb. ³⁵ Ne ziyza de gunaa ni guty de xfamilni, pur güeldilaazdeb Dios ax gubíi gubány de xfamildeb stuby.

Per nuuza bniety masqui gutydeb, per par laadeb mazru güen gudeeddeb guelzii laznaa de ni gudinxú laadeb xlat ni nizigueldeb nisaandeb ni reldilaazdeb Dios, te par gapdeb stuby guelnabány cuby ni mazru sac. ³⁶ Nuuzadeb gudeeddeb guelzii baany biny burli laadeb, btaaz biny laadeb, axt bldiiby biny laadeb cun caden ne guudeb lizguiib. ³⁷ Nuuzadeb gudinxú biny laadeb cun guia, nuuzadeb gutydeb chi baany de biny laadeb iruldti cun sierr, o gutyzadeb cun spad. Ne nuuzadeb iranezzi cuandzadeb nacudeb guidy llíly o guidy chiv, prob, nalaas xquel cuandzadeb, iralote ni banné biny laadeb. ³⁸ Cuandzadeb de nez lo yiubiz, láani de dany, ne láani iralote de cuev. De bnietqui niclí quit riáldti nibánydeb lo guichliu pur güen ni gúcdeb. ³⁹ Ne masqui iratedeb bíeny dec guldípacdeb güeldilaazdeb Dios, per quit cuáatideb ni raipny

laadeb. ⁴⁰ Te pur laany baanny xgab pur tuby cos güenru par dunned, ax quitga gucti ni raipny laadeb te par tubylote icáan cun laadeb ni guniiny.

12

¹ Pur ningui, zec ni abindiagni pur zienzi bniety xa xquel güeldilaazdeb Dios, ná par isáanni tuby lad irate de duld ne irateru de ni rcua idxanní zec ni riáld, ne quit choaclaaztin chonuun nez ni abliuu Dios dunned. ² Ná par chonén cuend Jesucrist, te pur, pur laany zeed guelreldilaaz ni rdxapni ne pur laatisny rialo guelreldilaaz ni rdxapni. Laany belaazny guelzii ni gudeedny lo cruby, quit nitiu-lotiny gutyny ziy te pur laany nánny dec chi abialo gudeedny guelzii qui, ax zeed guelrzaclaaaz. Ne anre ax azubny lad naldí xte Dios llayabaa.

³ Gulgaany xgab xa gudeed Jesucrist guelzii laz-naa de binduld te par quit idxat, quit chaxaclaazti zec ni cadeedti. ⁴ Te pur nicli cateed bniety laat guelzii pur ni cayunti pur quit gúnti duld, per gady chúutit lo guelguty pur ziy. ⁵ ¿Ta abianlaazti xa blidx Dios laat zec de lliinny? Lo xquiitsny rnii: Lliinia, baany cuend zec ni rlidx Xtadni Dios liú, ne quit chaxaclaazu chi rguxnezny liú.

⁶ Te pur laany rdeedny guelna irate de ni rac lliinny,

rguxnezny laadeb pur ni rcaazny laadeb.

⁷ Pur ningui, gulgüelaaz de guelzii, te pur güen par laatiy. Dios cayunnény laat zec ni runné tuby bniety lliinni te pur, ¿tatix nuu dad ni quit rguxnez lliinni? ⁸ Anre belati quit cuxnez Dios laat zec ni runny cun irar u lliinny, niy zelo dec gati lliintipacny laat, gati laatin y rac xtadtí. ⁹ Laat

nánti dec chi gucní bichiin, btaaz xtadní dunní par icuadiagní diidx ax bdxapní didxdoodeb. Anre, ¿xílezni quit icuadiagní xtiidx Xtadní Dios ni rbez llayabaa, te par idxapní guelnabány cun laany?
10 De xtadní rguxnezdeb dunní pur tuby tiop dxi ni ziopní lo guichliu par idxanní zec ni rrilodeb ná güen. Per Dios rguxnezny dunní par tuby cos güenru par dunní, rguxnezny dunní par ibánní nania zec laany. **11** Didxldíquiy dec nic tuby guelna quit naguillyti hor ni cadeednini sino que racnan. Per de ni rseed rcuadiag diidx pur ziy, ax rbánydeb zacru ne naldiú nez lo Dios.

12 Pur ningui, gulduzaclaaz laat, guldeed valor laat zecpacza tuby ni rbíi rcáa juers chi abdx-atecbi. **13** Gulgaany pur ibányti xnezni, te par de ni rzacan xa gúndeb, quit isaandeb xnez Dios sino que chuzaclaazdeb chanuudební.

14 Gulgaany pur ibányti naldiú sin didxguidx cun irate bniety, gulbány nania te pur ni quit nabány nania quit xo iniátib Xtadní Dios.

15 Gulcualo te par quit chúu tubytí ni isáan tuby lad zec ni rcaaz Dios gacnény laab, te par quit chúu tubytí ni gac zec tuby cuanldá ni run dány ax íxiinbi iraru de saat. **16** Nic tubytí quit náti par icaréldti ni quit illiú cun ni quit rac chialti, quit gúnti menos cun de cos güen ni zeed pur Dios te par quit teedti zec ni gudeed Esaú, pur tuby plad comid btóob guelnabee ni riáldbi zec gulo ni náb lo betsbí.

17 Ne laat nánti dec chi bcaaz Esaú niunldee xtadbi quiab, ax aquit biáldtib bendiciony ni riáldbi zec gulo ni náb. Masqui quesentiand biinbi gunaabbíni, per aquit xo nichutib ni baanbi.

18 Laat gady ibiitit rut quit náti par iguaaldti zec

ni gubii de bniety Israel gulalqui nii dany Sinaí rut gunádeb cayac bal quia danqui, gunádeb tuby guuxngas ni bcuaytec quia danyqui ne rbíiga tuby biroo ruy zecpacza tuby bdun. ¹⁹ Chiy bindiagdeb bcuidx tuby trumpet ne bindiagdeb rsee Dios guninény laadeb. Per de tant ni bdxibdeb bindiagdeb rseeny ax quesentiand banlasdeb quitru ininény laadeb. ²⁰ Te pur laadeb nández la nagán ni gunabee Dios laadeb chi guniiny: “Tutix bniety o ladxaaza ni lda tiix danyqui ná par gaty cun guia o cun lanz.” ²¹ Quesentiand cuendroo ná ni gunádeb axt Moisés gunii: “Racdxaaicha tant rdxibia.”

²² Per laat quit gudeedit ziy sino que agubigaxti lo Dios. Anuu nez idzinti quia dany Sión, llayabaa rut ná Jerusalén ladx Dios ni rbeznabány, rut dxassaa zienguilliu de ángli ²³ rzaclaaazdeb rtodebnny ne rut idxasaa de xpiny Dios de ni a cá láni lo libri xte llayabaa. Ruy rbez Dios, laany ni icáany cuend pur irate bniety, ne ruyza nuu de spírit xte de bniety ni gubány zec ni riáld laadeb ni ananiadeb pur Dios. ²⁴ Ruya rbez Jesucrist, laany ni bxalny nez cuby ni ardxapni par cun Dios. Chi guty Abel riñy xtenbi gunaabni gac guelgurtisy, per cun Jesucrist quit gueti ziy sino que laany gutyny, bxíiny riñy xtenny par idxapni perdón.

²⁵ Pur ningui, gulcualo gónti cuend Dios, laany ni rnineny dunní. Te pur belati de bnietcla ni quit niun cuend xtiidx Moisés ni bteed xtiidx Dios lo guichliuré quit nilátideb lo castigu ni riálddeb, ax latixcu dunní quit idxáldni castigu belati quit idxanní cuend xtiidx Jesucrist, laany ni beedny desde llayabaa par inineny dunní. ²⁶ Chi guniné Dios de bniety gulal quia dany Sinaí, bzees guichliu. Per

anre laany aguniiny: “Teru iseesa guichliu stuby, per gati guichliuzti néza yabaa.” ²⁷ Chi rnii Dios dec teru gúnny ziy stuby, niy zelo teru izees irate ni banchuuny, de ni ná par ibicá, ax yáan de ni quit ná par ibicá. ²⁸ Pur ningui, ná par ideedni gracy Dios ardxaldni rut canabeeny, rut quit chúuti dxi nitlo, ax cun didxdoo ne cun guelnadxiby ná par idxanní ni rdxalaazny. ²⁹ Te pur Dios xtenní ná zec tuby balroo ni rzaaicqui irate.

13

¹ Quít isaantí ni rcaaztí de sanireldilaaztí Jesucrist. ² Quít yianlaaztí gactí güen cun de ni rdzíny ruliztí, te pur, pur ziy nuu de bniety ni abaany recibir de ángli xte Dios sin quít góntideb tú laadeb.

³ Gulchanelaaaz de ni nuu láani lizguib, nalaazquit né laat nunétdeb láanqui. Ziyza gulgaany xgab pur de ni cadeed guelzii, gulchanelaaaz dec ziyza zelee teedtí guelzii.

⁴ Gulgáp didxdoo guelguchnaa, quít góntí engany chialtí. Te pur Dios zunny castigu de ni nap stuby nguiu o stuby gunaa, ne irateru de ni caréld ni quít illiú cun ni quít rac chialdeb.

⁵ Quít sebylaaztit mily, gulyáan cunformí cun ni naptí te pur Dios aguniiny: “Isaate dxi zuguaníaa liú, ne quit chúuti dxi cuelaaza liú.” ⁶ Ax cun confianz zelee iniin:

Xtada Dios ná ni racné nare, quít rdxibtia ni gunnétisy biny naa.

⁷ Gulchanelaaaz de bniety ni gunabee lot, laadeb ni bseeddeb laat xtiidx Dios. Gulgaany xgab zec ni gubánydeb, ax gulchanuu zec ni güeldilaazdeb Jesucrist.

⁸ Ne Jesucrist lagacniy nay, lagacniy andxiré ne iduibtiamp te. ⁹ Quit isaanti gacti engany pur iralozy de cos ni rliuu bniety, de ni quit náti zec ni riáld chanuut Crist. Mazru güen gulgáp confianz guelgucn é xte Dios par ibányti xnezni xlat ni chanuut de costumbr i cún ni chalee iquiinti o cún ni quit chalee iquiinti, te pur de costumbr qui quit xi racnétidey nez lo Dios.

¹⁰ Dunn i rdxapni tuby ni guty pur dunn i, laany náy zec tuby ni rungun bniety pur de xtuldbi, gun ni quit xo iquiinti de bxoz yudooqui. ¹¹ Sino que bxozroo ni rnabee, laab renéb riny xte de ladxaa ni rungun bniety pur de duld, renéb rinqui laniudoo rut ná par chanébni. Chiy de manygutu qui raaicqui ruxchu rut quit tu rbehti. ¹² Ziyzaquiy guc cun Jesucrist, ruxchu guidx Jerusalén gutyny par isíeny bniety xte de duld pur riny xtenny. ¹³ Pur ningui, gultoo chonuun Jesucrist masqui guléedebny guidx Jerusalén, ne masquiza xtiutisy o guelziitis y ni ideedni zec laany. ¹⁴ Te pur lo guichliuré quit rdxaptin tuby guidx rut arbeztecni sino que dunn i canuun rut teru ibezni par chazy. ¹⁵ Pur ningui, cun guelgucn é xte Jesucrist quit teedti ideedni gracy Dios, niy ná gun ni ideedniny, ne ziy xquel caziruun dec xpinn y dunn i. ¹⁶ Quit yianlaazti gúnti ni ná güen ne gacnét de saat zec ni chalee, te pur de cosqui ná ni rdxalaaz Dios.

¹⁷ Gulcuadiag xtiidx de ni rnabee lot, laadeb ni rseeddeb laat xtiidx Dios. Gulgáp didxdoodeb te pur laadeb cacualodeb chanuut xnez Dios, pur ni nández dec teru ideeddeb cuendny. Gulgaany ni saclaazdeb gati ni saclasdeb, te pur guél quit

rcuadiag diidx quit xi illiútiy par laat.

¹⁸ Gulnaab lo Dios pur dunní. Dunní nánní dec quit xi malti cadxanni, ne rcaazní dec irate ni idxanni, idxannini xnezni. ¹⁹ Rguiin rnaaba lot inaabti lo Dios pur nare, te par iníidxny permis yiub guelda suguanía laat stuby.

²⁰ Jesucrist laany ni napny guelrnabee, rcualony dunní zec ni rcualo tuby pastor de llíily, pur guelguty xtenny ardxapni nez par cun Dios iduibtiampete. Ne Dios laany ni rguaadny guelnaldiulaaz, laany ni gusbánny Jesucrist lo guelguty, ²¹ laany gacnény laat par irate ni ná güen te par chalee günti zec ni rcaazny. Laany gacnény dunní par gacni zec ni rcaazny pur ni anan tubyzi cun Jesucrist ax, jzaibguelpac idxapni didxdoony iduibtiampete! Amén.

²² De sanioldilaazni Jesucrist, quit cuenzi gurroozi cartré, per rguiinia lot quit chaxaclaazti pur de diidx ni calidxa laat. ²³ Ne ziyza rguixtiia lot dec abdiia xcumpnierni Timoteo láani lizguiib, ne belati idzingab nezré, ax iropten yiopguiaan laat.

²⁴ Gulguaapdios irate de ni rnabee lot laadeb ni rseeddeb laat, ne irateru de sanioldilaazni Jesucrist. Ne de bniety Italia rguaapzadios laat.

²⁵ Dios gunldeený quia iratecti. Amén.

**Xtiidx Dios cun ditsa
New Testament in Zapotec, San Juan Guelavía
(MX:zab:Zapotec, San Juan Guelavía)**

copyright © 1995 Wycliffe Bible Translators, Inc.

Language: Zapotec, San Juan Guelavía

Translation by: Wycliffe Bible Translators, Inc.

Zapotec, San Juan Guelavía

zab

Mexico

Copyright Information

© 1995, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, San Juan Guelavía

© 1995, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

4b6898c2-1ae7-5b64-b781-1a33bd63388f